

Sepoko ka hara dipijama tsa Nkgono



Pale ka Kai Tuomi

Ditshwantsho ka Magriet Brink le Leo Daly

Onke o ne a kgalehile betheng ya hae e nyane, ka kamoreng ya hae e nyane, tlung eo a neng a dula ho yona le Mme, Ntate, Nkgono le ntjanyana ya hae e bitswang Puppy. Puppy o ne a robetse hodima kobo e kgubedu maotong a bethe ya Onke. O ne a honela tlaase a bile a lora a lelekisa dikwirele pakeng.

Hanghang Onke a utlwa lerata le leholo mme a phaphama a tshohile. A hula dikobo a ikgurumetsa ka tsona. “Ke tshepa hore ha se setshosa kapa sepoko se tshabehang. Ha ke rate dipoko.” a rialo, a thothomela.

KGWAHLA! “Ke leo hape,” a rialo, a leka ho iketsa sebetenyana. “Ke lokela ho batlisisa hore ke eng e etsang lerata leo.” Yaba Onke o nka totjhe e tala ya polasetiki eo a neng a e beile tafoleng e pela bethe ya hae, mme a bonesa ka yona hohle ka phaposing.

“Na o nahana hore ke sepoko se entseng lerata leo?” Onke a botsa Puppy, ya neng a ntse a kgalehile. Onke a mo phaphatha hloohong.

HOO! HOO! Ha hlaha lerata le leng le letjha le tswang ka ntle.

“Na ebe ke sepoko?” ha botsa Onke, a bentsha totjhe ya hae ho bonesa fensetereng.

Ntho e kgolo, e nonneng e sootho, e tletseng masiba, e nang le molomo o motsu o mosehla, e ne e dutse hodima lekala ka ntle. Onke a tsheha mme a re, “Ha se sepoko ntho yane. Empa feela e le sephoko se dutseng sefateng. Empa ke a ipotsa hore ke eng e neng e etsa lerata lane le kgwahlatsang?”



HOO! HOO! Sephoko se seholo sa phukalatsa mapheo a sona mme sa fofela kwana ho parola tshimo.

“Diphoko di tsoma ditweba le ditadi bosiu, ke kahoo batho ba sa keng ba di bona. Hantlentle ke lehlohonolo ho bona sephoko,” ha rialo Onke. “Na ha ho jwalo, Puppy?”

Empa Puppy o ne a ntse a ile le sephume sa boroko, yaba Onke o pholla mpanyana ya yona e boya, mme ya hona ya thetabela kobong ya yona e kgubedu.

“Mohlomong ke mpa ke tshoha difotle,” Onke a nahana jwalo. Empa jwale a bona ntho e nngwe e lefifi e tshosang hukung ya phaposi. E ne e shebahala jwaloka setshosa se seholo se nang le mapheo a lenong le dinala tsa tau le nko e telele e kang ya kolobemoru.

“Na ke sepoko seo?” a rialo, a lebisa kganya ya totjhe hukung ya phaposi. Onke a tsheha ha a bona hore ke eng hantlentle. “Empa feela e le diaparo tsa ka tse ditshila, tse leketlileng setulong. Hoja ka di tlosa ka di bea hantle jwaloka ha Mme a ne a nkopile. Na ha ho jwalo, Puppy?” Empa Puppy o ne a ntse a ithobaletse.



“Empa e ne e le modumo wa eng ola o kgwahlatsang oo ke o utlwileng pejana?” ha rialo Onke. *KGWAHLA!* A utlwa modumo oo hape mme a thothomela. “E *tlameha* hore e be e le sepoko,” a nahana jwalo, “mme e utlwahala eka e fofa moyeng ka ntle ho phaposi ya ka.”

Onke o ne a leka ho ba sebete, leha mangwele a hae a ne a thothomela jwalo ka jeli. A nyarela ka ntle ho lemati la kamore ya hae, mme a sheba phaseitjheng e lefifi.

Empa ho ne ho se na letho teng, e le feela dieta tsa batswadi ba hae di beilwe pela lebota, le sejana sa metsi sa Puppy hodima mmata o monyane. Onke a nanya hodima mmata phaseitjheng, a feta kamore ya batswadi ba hae, mme a nyarela ka kitjhineng.

“Ke sepoko!” a hoeletsa, a bentshetsa totjhe ya hae hodima seriti se setsho se emeng haufi le setofo. Sepoko seo se ne se apere dipijama tse bolou tse nang le nku ho tsona.

“Tseo ke dipijama tsa Nkgono,” ha rialo Onke. “Hobaneng o utswitse dipijama tsa Nkgono, wena Sepoko?” Onke a shebisa lebone la totjhe hodimo hore a bone sefahleho sa sepoko. E ne e le Nkgono!

“Onke,” ha rialo Nkgono, molomo wa hae o ahlame ke ho tshoha. “O ntshositse haholo. Ke nahanne hore o sepoko.”

“Ke nahanne hore wena o sepoko,” Onke a rialo a keketeha.

“O etsang ka kitjhineng bosiu bo bokana, Nkgono?”

“Ke ne ke sa kgone ho robala,” ha rialo Nkgono, “kahoo ka tla ka mona ka kitjhineng ho tla batla kopi ya lebese le tjhesang le dibisikiti. Na o batla ho ja le nna seneke sa bosiu bo boholo?” Onke a bososela mme a oma ka hlooho.

Yaba yena le Nkgono ba dula tafoleng ya kitjhine ba qoqela fatshe ba ntse ba qopetsa dibisikiti tsa botoro tse monate ka hara mabekere a lebese le futhumetseng. Yaba hape ba etsa samentjhise e besitsweng, e nang le heme, kase, tamati, le lethise e foreshe e tala mme ba e arolelana.





Ha ba qetile ho ja le ho nwa, ba borosola meno a bona lekgetlo la bobedi bosiung boo. Yaba Onke o fonanisa Nkgono mme a leba kamoreng ya hae. Eitse ha a bula lemati, Puppy a tlola mme a bohola.

“Puppy,” ha rialo Onke, a mo phaphata hloohong, “ke nna. O ne o nahana hore ke sepoko?”

Puppy a mo nyeka sefahlehong mme a ipotoka hodima kobo ya hae e kgubedu.

“Ke rarollotse qaka bosiung bona. Na o a e tseba taba eo, Puppy?” ha botsa Onke.

Empa Puppy o ne a se a ikgarile kobong a kwetse mahlo a hae.

“Ke mohopolo o motle oo,” ha rialo Onke. “Robala ha monate, Puppy.”

IQAPELE!

- Ntja ya Onke, Puppy o ne a lora. Kgothaletsa bana ba hao ho taka setshwantsho sa Puppy a kgalehile mme ebe o ba kopa ho kenya pudulwana ya monahano e nang le setshwantsho ka hara yona ho bontsha seo Puppy a neng a lora ka sona.

Sepoko ka hara dipijama tsa Nkgono

Pale ka Kai Tuomi • Ditshwantsho ka Magriet Brink le Leo Daly



Setshwantsho

Ntjanyana ya Onke, e leng Puppy, e ne e lora. Toroya setshwantsho sa Puppy e khalehile thuwe! e be o etsa pudulwana e nang le setshwantsho ka hare ho bontsha hore na Puppy o ne a lora eng.



Ho bala


Eba lefokisi la pale! Fumana mantswe paleng ena a o bolellang hore:

- ★ Onke o ne a se a borosotse meno a hae pele a lo robala qalong ya pale ena
- ★ Onke o ne a nahana hore a ke ke a tshoha haholo haeba a ka tseba hore na ke eng e etsang lerata le mo tsositseng borokong
- ★ o ile a tshoha ha a sheba tlase phaseitjheng e lefifi
- ★ o ne a nahana hore sepoko se apere pijama ya Nkgono
- ★ Puppy o ne a ile le sephume sa boroko hodima bethe ya Onke nako ena kaofela ha Onke a le ka kitjhineng.



Ho ngola

Ngola pale ya hao ya ntho e tshosang e etsahalang bosiu.



Mosebetsi wa matsoho

O ka rata ho ja eng e le seneke sa bosiu bo boholo? Sebedisa hlama ya ho bapala kapa letsopa ho iketsetsa seneke se monate sa bosiu bo boholo.



Tshebetso

Ke ditsela tse ngata hakae tse fapaneng tseo o ka di fumanang tsa ho iketsa sepoko se tshosang? Aparang jwalo ka dipoko ebe le tjhentjhana ka ho tshosana. O nahana hore dipoko tse mosa di tshwarana jwang? Tshwantshisang sena.